

SCRIPT OF EVENING GOJRI NEWS BULLETIN 20DEC 2025

1700HRS

ایوننگ گوجری نیوز بولٹین 20 دسمبر 2025

یوہ آکاشوانی جموں ہے عبدالرحمان تے نصرت چودھری تیں خبر سنو۔

HEADLINES

- ۱۔ لیفٹیننٹ گورنر منوج سنہا نے محکمہ داخلہ غے ماتحت محکماں غی ایک اعلیٰ سطحی جائیزہ میٹنگ غی صدارت کی۔
- ۲۔ وزیر اعلیٰ عمر عبداللہ نے جموں کشمیر ماہہ بارش و برف باری غی پیشین گوئی غا تناظر مانہہ موسم سرما غی تیاریاں غو جائیزو لیو۔
- ۳۔ جموں کشمیر پلس پولیو مہم 2025 واسطے پوری طرح تیار ہے جس خاطر 10 ہزار تیں متہ بوتہ 2 سو 48 ٹرانزٹ پوننٹس تے 5 سو 18 گشتی ٹیم پورا مرکزی زیر انتظام علاقہ مانہہ قائم کی گئی ہیں۔
- ۴۔ تاریخی مولانا آزاد سٹیڈیم جموں مانہہ اج پہلو بین العقوامی دنگل رستم اے جموں کشمیر 2025 شروع ہوو۔
- ۵۔ محکمہ موسمیات نے پیشین گوئی کی ہے جے اج دیر رات نانہہ ہلکی تیں درمیانہ درجہ غی بارش ہوسکے۔

LG MEETING

لیفٹیننٹ گورنر منوج سنہا نے لوک بھون جموں، مانہہ محکمہ داخلہ غے ماتحت محکماں غی ایک اعلیٰ سطحی جائیزہ میٹنگ غی صدارت کی۔ میٹنگ مانہہ 2025-26 غا بجٹ تے اخراجات ور گل بات کی گئی جن مانہہ جیل خانہ جات، مقدمہ چلان غو عمل، ہوم گارڈ، ایس۔ڈی۔آر۔ایف، آگ بجھان تے ہنگامی خدمات، فرانزک سائنس لیبارٹری، سابق فوجیاں غی فلاح و بہبود تے پی۔ایس۔اے مشاورتی بورڈ وی شامل تھیں۔ لیفٹیننٹ گورنر نے جاری اہم منصوباں غو وی جائیزو لیو جن مانہہ کٹھوعہ غا مہانپور مانہہ ہائی سکیورٹی جیل غی تعمیر، جموں فرانزک لیب مانہہ سائبر ڈویژن غو قیام، سرینگر مانہہ سائبر ڈویژن غی درجہ بہتری تے سرحدی ضلاع مانہہ بنکراں غی تعمیر شامل ہے۔

LG SSB DAY

سشستر سیما بل غا یوم تاسیس غا موقع ور لیفٹیننٹ گورنر منوج سنہا نے ایس۔ایس۔بی غا جواناں تے اُن غا اہل خانہ نانہہ مبارک باد پیش کی۔ اُنہاں نے فورس نانہہ ملک غو مضبوط تے بے خوف محافظ قرار دتو تے کہیو کہ ایس۔ایس۔بی غا جوان پوری لگن، بہادری تے ایمانداری غا نال اپنی خدمات انجام دے رہیا ہیں۔ سماجی میڈیا ور اپنا ایک پیغام مانہہ لیفٹیننٹ گورنر نے ایس۔ایس۔بی اہلکاراں غی پیشہ وارانہ صلاحیت، قربانی تے ملک واسطے بے لوث خدمات نانہہ سپرایو۔ اُنہاں نے کہیو کہ سرحدان غی حفاظت تے قومی سلامتی مانہہ ایس۔ایس۔بی غو اہم کردار ہے تے ملک ان غی خدمات غی شکر گزار ہے۔

CM MEETING

وزیر اعلیٰ عمر عبداللہ نے آج موسم سرما غی تیاریاں غا حوالہ سنگ ایک مربوط جائیزہ میٹنگ غی صدارت کی جس غے دوران دواں صوباں مانہ سڑکاں، بجلی تے پانی غی فراہمی صحت غی خدمات تے کھان آلی اشیاء ور ضروری چیزاں بستاں غی دستیابی غو جائیزو لیو گیو۔ میٹنگ مانہ وزراء سکینہ اتو تے ستیش شرما غے علاوہ وزیر اعلیٰ غا مشیر ناصر سوگامی نے وی شرکت کی وزیر اعلیٰ نے تمام محکماں نانہ ہدایت دتی جے وے ترجیحی رستاں ور 24 گھنٹہ برف ہٹان غا عمل نانہ یقینی بناویں بجلی تے پانی غی بلا تعطل فراہمی برقرار رکھی جے کنٹرول رومز نانہ مکمل طور ور فعال رکھیو جے تے ہنگامی حالات مانہ فوری رد عمل نانہ یقینی بناویو جے تانجے موسم سرما غے دوران عوامی مشکلات نانہ کھٹ تیں کھٹ کیو جاسکے۔

PULSE POLIO VACCINE

جموں کشمیر مانہ پلس پولیو مہم غے تحت حفاظتی ٹیکہ کاری بارے قومی تہاڑو 2025 گو آغاز 21 دسمبر نانہ وے گو اس مہم مانہ صفر توں 5 براں غی عمر گا 19 لکھ توں متا بچاں نانہ پولیو ویکسین پلائی جے غی جد کہ کھر کھر مہم 22 تے 23 دسمبر نانہ جاری رے غی تانجے کوئی بچو ویکسین تیں محروم نہ رہ جے۔ اس سلسلہ مانہ حکام نے دسیو ہے 10993 غے کول کال بوتھس 248 ٹرانسٹ پونیٹ تے 518 موبائل ٹیم تعینات کی گئی ہیں۔ اس بارے مزید جانکاری دیتا واں ریاستی ٹیکہ کاری افسر، ڈاکٹر شاہد حسین نے اس طرح کہیو۔ اسی دوران ضلع انتظامیہ تے محکمہ صحت ریاستی نے قومی ٹیکہ کاری تہاڑا 2025 واسطے مکمل تیاری کر لی ہی۔ ضلع مانہ صفر توں 5 براں غی عمر گا 58 ہزار 808 بچاں نانہ پولیو غا قطرہ پلان غو ہدف رکھیو گیو ہے۔ اس بارے مزید جانکاری دیتا واں ڈپٹی چیف میڈیکل افسر ریاستی ڈاکٹر ایم۔ وائی۔ خان نے اس طرح کہیو۔

POONCH FOOD SAFETY

تہوار غا موسم غے دوران کھان پین غی اشیاء غی حفاظت نانہ یقینی بنان واسطے خوراک غی حفاظت بارے محکمہ غا سربراہ نے دیگر محکماں گا نمائنداں غے نال پونچھ غا مختلف بازاراں غو معائنو کیو۔ یاہ جانچ کرسمس، غی تقریبات تیں پہلاں دکاناں مانہ کھان پین غی اشیاء غا معیار نانہ دیکھن واسطے کی گئی۔ جانچ غے دوران کئی دکانداناں غے خلاف کارروائی کی گئی کیونجے وہ خوراک غی حفاظت غا قوانین غی خلاف ورزی کر رہیا تھا جسراں کہ غلط سامان رکھنوتے مدت ختم ہوئی وی چیزاں غو استعمال کرنو شامل ہے۔ ٹیم نے گجھ گیس سلینڈر وی ضبط کیا جہیڑا غلط طریقہ تیں استعمال ہو رہیا تھا۔ اس بارے مزید جانکاری دیتا واں، خوراک غی حفاظت بارے کمشنر، طارق محمود نے اس طرح کہیو۔

RUSTUM E JK

آج جموں غا تاریخی ایم اے سٹیڈیم مانہ اپنی پہلی بین العوامی دنگل تے رستم اے جموں کشمیر 2025 غا خطاب غو آغاز ہوو۔ اس کھیڈ مقابلہ غو افتتاح نوجوان خدمات تے کھیڈ بارے محکمہ غا وزیر ستیش شرما نے کیو، جس مانہ مختلف محکماں غا

اعلیٰ افسر وی موجود تھا۔ اس مقابلہ مانہ 100 تیں متہ قومی تے بین العقوامی پہلوان حصو لے رہیا ہیں۔ جہڑا رستم اے جموں کشمیر 2025 غو خطاب جیتن واسطے مقابلو کریں گا۔ یاہ تقریب پہلاں 17 دسمبر نانہہ ہونی تھی لیکن کُجھ وجوہات غی بنا ور اس غی تاریخ تبدیل کردتی گئی۔ اس موقع ور ذرائع ابلاغ سنگ گل کرتا وان کھیڈ غا وزیر ستیش شرمانے اس طرح کہیو۔

RAJOURI PGKO

اج راجوری مانہہ پرشاسن گراں غی اور ، مہم غا دوجا تہاڑا غا موقع ور چار شکایت ازالہ کیمپ لایا گیا۔ اک شکایت ازالہ کیمپ گورنمنٹ ہائر سکینڈری اسکول ڈھنگری مانہہ منعقد ہوو۔ ہر طبقہ غا لوکاں نے ان کیمپاں مانہہ شرکت کی تے سرکاری سکیمیاں غا بارا مانہہ جانکاری حاصل کی تے نال ہی اپنی انفرادی تے اجتماعی شکایات پیش کیں۔ محکماں غی جانب تیں اسٹال لایا گیا تانجے موقع ور ہی عوامی خدمات دتی جاسکیں تے شکایات غو حل کڈیو جاسکے۔ اسی طرح غی شکایت ازالہ کیمپ، کالا کوٹ، نوشہرہ تے تھنہ منڈی، بلاکاں مانہہ وی منعقد ہوو، جت عوام نے بڑھ چڑھ غے حصو لیو۔ اس بارے مزید جانکاری دیتا وان پروگرام غا نوڈل افسر راجوری، خورشید احمد نے اس طرح کہیو۔

SERICULTURE RAMBAN

ریشم کاری شجر کاری مہم غو مقصد شہتوت جیسا پودا لاتا ہیں تانجے ریشم غا کیڑاں غی خوراک لب سکے اس تیں ریشم غی پیداوار بدھے غی، تے دیہی علاقان غا لوکاں غی آمدنی مانہہ اضافو وے غو۔ اس مہم غے تحت کساناں نانہہ بوٹا گیا ہیں جس تیں بنجر زمین نانہہ دوبارہ تیں آباد کیو جاسکے غو۔ اس تیں مقامی معشیت نانہہ وی فروغ لبے غی۔ آکاشوانی غا خبراں آلا شعوبہ سنگ گل کرتا وان ضلع ریشم کاری افسر، رام بن راجیو گپتا نے اس طرح کہیو۔

WEATHER

گزشتہ رات تے اج سویرے جموں شہر تے اس غا کول کال غا علاقان مانہہ شدید تھند چھانی رئی۔ جموں غا میدانی علاقان مانہہ خشکی برقرار ہے گھنی تھند غی وجہ تیں عام زندگی بُری طرح متاثر ہوئی تے لوکاں نانہہ سفر مانہہ کافی پریشناں غو سامنو کرنو پیو۔ کیونجے حد نگاہ کھٹ تھی۔ محکمہ موسمیات غے مطابق اج رات یا کل ہلکی تیں درمیانہ درجہ غی بارش بوسکے ، جس سنگ خوشکی، سرد موسم تے تھند مانہہ کُج راحت لبے غی۔ اس بارے مزید جانکاری دیتا وان محکمہ موسمیات بارے افسر نے اس طرح کہیو۔

FOG FLIGHT DISRUPTIONS

شہری ہوائی نقل و حمل غی وزارت نے مسافراں نانہہ مشورو دتو ہے کہ دھند غی وجہ تیں پروازاں مانہہ ہون آلی تبدیلیاں غا بارا مانہہ انیرلائنیز، ہوائی اڈاں تے سرکاری ذرائع تیں تازہ معلومات لیتا رہیں۔ وزارت نے مسافراں تیں کہیو کہ سفر واسطے اضافی وقت رکھیں تانجے سفر مانہہ پریشانی نہ وے۔ وزارت غے مطابق وہ محکمہ موسمیات غے نال مسلسل رابطہ مانہہ ہیں تے موسم غی تازہ صورتحال

نانہ دیکھتا وان، فیصلہ لے رہیا ہیں کج پرواز انرلائنز غی طرفوں منسوخ کی
جائی ہیں تے مسافراں نانہ پہلاں تیں ہی اطلاع دتی جائی ہے تانجے وہ بلا
وجہ ہوائی اڈہ ور نہ آئیں۔ وزارت نے کہیو کہ متاثر مسافراں نانہ مکمل رقم
واپس کی جے غی، تے مفت مانہ وقت غی تبدیلی، غی سہولت دتی جائی ہے۔
